

## PHILIPPIANS

*Paul-hu Philippi ekaresia jejämade jöhoje.*

<sup>1</sup> O asë'e Iesu Keriso'o gemuore jëvoromo Godare ariböviëro jëvë'ëro Philippi amore raromarujoho Paul na'o Timothy'o Iesu Keriso-are mu vaejaharue ae niö'i noro jemesi örire jejämijö gare. O ekaresia muebejëvaruje ariböviohu'o ekaresia ajämijaruje ariböviohu'o jemesi örire jejämijö.

<sup>2</sup> Na nege God nosi Vavuohu'o Bada Iesu Keriso'o huë baeromo ajämijego maro raromo'irarijego.

*Paul-hu Philippi ekaresia uehorovoromo God'o  
jö jövonövade jöhoje.*

<sup>3</sup> Naehu jemë uehorovëvë'iroho jemëni God nasi Börömoho huë mae uavajeje. <sup>4</sup> O jemëni God-are örire jö jövë'iroho nimorohë'i jöho majahijajeje. <sup>5</sup> Rabëni hesi bëhoho mami'e jemëhu aeko'i na'o bimuvoromo Keriso-are jö ma hesi mu ajemijarijoho ëhi ajemibe ruejuvo jaruvohu'o ëhi gemuoho ajemijarujeje. <sup>6</sup> Ëhuni na mae uehorovoromo uvajeje: God-ro mabëhe aevoromo jemesi dë vövöbajo'o avohëvadoho iae ëhi avohëvobe va'ojuvo hujeji Iesu Keriso-are majaho rue'iramu avohëvo barë'ajëjo. <sup>7</sup> God-hu jemë ëhi avohëvobe va'a'ajë uvajoho ëho iae maeje ë hesi bëhoho jemë nasi dë vövöbajo'ere jëvë'ego. Jemë na'o gemuore mu mabëhe baejë'e jëve. God-ro mu mae bojemamu urimoho na savoji gagoroho bogo hijë'iro hesi jö ma hesi

jöhuni biririvoromo majëhibe rovodoho jaruvoho na savoji gagore hijë'i éhi gemuoho majëhijajeje. Jemëro éhi jië'e mu mabéhe na'o bimuvoromo ajemibe rovë'e jëve. <sup>8</sup> Röhu Iesu Kerisoro nasi dëre rumorovevego na jemëni sisë maro vavaenegajeje. God-ro gel'ego na mae uëve.

<sup>9</sup> Röhu ave jöho na jemëni éninamijajeje. Naro uavajeje huro jemë ajëmijego jemë simane mae jioromo mue bövie bise'e garomo ae rajahuijaru-joho gö'o gö'o döre éhi'obe va'oromo <sup>10</sup> éhuro rabe rabe maho jiego ga'irarijego. Éhi jië'oho Keriso-are majaho rue'iramu jemë jö sisëho bogojëvo'i uhohu'o ma-maemu jëvo'ë'e. <sup>11</sup> O Iesu Kerisohu ajamuego vaejarue mu mahuro jemë'o rumorovëvo'ë'e éhuro God-are ihoho dö maro ajiomoröhego.

*Paul-hu hi juvonövade hesi bëhoho Keriso uehorovoromo juvonövade jöhoje.*

<sup>12</sup> Röhu nasi ö mueno'e na nege jemëro ave jöho ga'irarijego. Na ave savoji gagore hijamu mu rabehu rabehu nasi örire rovado-huro éhuro Keriso-are jö ma hesi muoho bogo sisérë'i marëjë'eje. <sup>13</sup> Marëjë'ëro éhu'ëro sa'a a börömo hesi javu atovarue ariböviohu'o a ioro'iore aho'obëhe jabu'o mae garomo uvoruomajeje: Nörö Keriso-are aëro jië'ëro savoji gagore hijajëjo. <sup>14</sup> O Christian ö mueno'e marohë'e maëro gevarue na savoji gagore hiromo mae biririvego geromo jabu'o daruge baeromo éhuro bogo juhuonivë'e mabéhe biririvoromo God-are jöho majëhijarueje.

**15** Ëaribövioho a ioro'iorohuro iae nasi mu mahuni dë vörönimoromo na iosiremi'irögoro Keriso-are jöho majëhijarueje röhu a ioro'iorohuro huë mae bojemi'i ë'arueje. **16** Jabumë uvarueje: God-ro nörö aviae bamade höjo ëhuro aëro God-are jö maho sareri'e atego nöröro aho'iröhego. Ëhuni jabumëro na mae uehorovevoromo Keriso-are jö maho majëhijarueje. **17** O ë aribövi ioro'iorehu Keriso-are jö majëhijaruoho bogo maho uehorovoromo ë'i a'i jabesi ihohemu uehorovoromo Keriso-are jöho majëhijarueje. Jaburo uvarueje: Noehu Keriso-are jö ae majëhijë'ohuro ëhuro a masijohuro heromo Paul savoji gagore hijajoho röhu gö'o döre i'ue bojamilaruëromo ëhuni Keriso-are jöho majëhijarueje.

**18** Röhu ëho hesije. Aehu ma-döhemu uehorovo'i o uhohu'o uehorovo'i o diehi uehorovoromo Keriso-are jö majëhijaruoho röhu aëro Keriso-are jöho iae majëhijarueje. Na ëho uehorovoromo nimorohajeje. Röhu bogo vuonugo'i ëhi gemuoho nimorohonövo'ejo. **19** Ëhesi bëhoho naro garomo uvajeje: Naehu ëhi sisë'i hijajoho jemëro nasi jöeni ëninami'iramu Iesu Keriso-are Aru'ahohuro ajemi'iramu ëhuro na mae hi'ejöjo. **20** Ëhuni naehu ave uehorovajohuremu nego avohe na bogo mae bogo javojoho baeromo muoho vuonugo'i a'i majae aho'o röhu avevejö'ohu'o biririvo avohoromo nasi arijo'arije aho'o bojamirovego Keriso-are ihohe dö maro jioröhego. Na ave sa'are hijë'oho o guomevë'oho ëhi gemu jiojöro nege. **21** Na ave

sa'are hijë'oho Keriso gemu uehorovë'i hibe juvajeje. O guomevë'oho jaruvo sisë'i hijanovajoho ijönö mabëhe hi'ejo. <sup>22</sup> Na ave sa'are égo'o hijë'oho ëhuro i'o mu'e birohonövo'ejo. Hesi nani'o diehi ë'ejo. <sup>23</sup> Na uehore niö'i jevo'ego ëho uehorovë'e hije. Iae na nege guomoromo sa'aho vuonugo'i va'o Keriso'o gemu mae hi'irodëni. Hu'o hijë'oho ëho mahoje. <sup>24</sup> Röhu naehu biririvoromo sa'are hijë'oho ëho börömohoje jemë ajëmi'irodohuni. <sup>25</sup> Ëho na eni gavë'e jeve. Ëhuni na garomo uve: Naro biririvoromo jemë'o hi'ejöjo ëhuro ajëmego Keriso mae uehorovobe nimorohobe va'irarijego. <sup>26</sup> Ëhi jië'oho naro röhu maho ö'iramu jemëro na geromo Iesu Keriso-are örire mabëhe rajahi'aruje.

<sup>27</sup> Röhu na diehi jevë'oho jemëro Keriso-are jö maho eromo raromo jijihore. Ëhuremu börömohoje. Ëhi ë'ë'oho ëhuro naehu ö'oromo gëvë'oho o öre égo'o hiromo ma-jemesi jöhemu hejë'oho na garomo uvo'ejo: Jemëro gemuoro riravoromo uehore gemu baeromo mue gemu nimoromo jö ma hesi muohuremu biririvoromo nigemarujëjo. <sup>28</sup> Biririvoromo nigemoromo jemesi jö bijönimoruomaje aribövioho bogo juhuonëmijarujëjo. Bogo juhuonëmijamu gëvë'ohuro ëhuro God-ro röjëhijajeje jabumëro garöhego maja ijönöho jabumë siséréjëvo'i jemë marojëvo'iröhoho jëvego. Iae God-ro jemë ajëmi'iramu marojëvo'ë'e. <sup>29</sup> Jemë Keriso-are mu börömoho niö'i baejë'e jëve. Göho Keriso-are örire mae uehorovo'irarijoho göho hesi jöëni vi'ehe bae'irarijoho. <sup>30</sup> Urimo jemë iae

gavarijeje na sivohoromo Keriso-are muoho nigemamu. O jaruvoho jemë hejarujeje aëro uvoruomego: Nöröro éhi gemuoho ë'aje höjo. Röhu ë mue gemuoho jemëro na'o bimuvoromo éhi sivohoromo ömo'aruje.

## 2

*No bogo nosi nimaruohemu uehorovo'i göehu  
gö huë baerovo'iröhe jöhoje.*

<sup>1</sup> Jemë aho'o Keriso-are ae gemuoho jëvajoho na jemë éhuro hejarujeje biririvëvego. Kerisohu jemë huë baejëvajoho na jemë éhuro hejarujeje jemesi dë vövöbajo'oho giogovëvego. Na jemë God-are Aru'ahohu'o gemuoro jëve. Na jemë göëro göhuni vavaenimoromo dë vövöbajo'e aho'o uehorovëvarujeje. <sup>2</sup> Éhi jëvë'e jiaje éhuni ma-gemuoro jioromo uehore gemu baeromo huë baerovë'e muoho gemu vaerego na heromo nimoroho avoh'o. <sup>3</sup> Nadi jemesi sinohemuoho uehorovoromo a ioro'ioroho éma iosirëmiromo ihoho döroho bamorovo'i uehorovoromo muoho vae'irögoro a'i ma-u'emu uehorovoromo a ioro'ioroho masije hö uvoromo jabesi ihoho döro bamore. <sup>4</sup> A ioro'ioro jabesi ihoho döro bamoromo röhu nadi jemesi jöhemuoho uehorovo'i a'i a ioro'ioro jabesi jöhu'o uehorovore.

*Kerisohu hesi nimajoho bogo uehorovo'i sa'are  
rueromo God-are jöhemu ejahadëhi noehu éhi  
ë'iröhe jöhoje.*

<sup>5</sup> Iesu Kerisohu uehorovadëhi éhi uehorovore.  
<sup>6</sup> Hu God jiajëhi éhi jiël'ëro röhu bogo

uvadeje: Naro biririvoromo God-hu hijajëhi  
 éhi hi'ejöjo. <sup>7</sup> Hu bogo éhioho uvo'i bövie  
 bise'e nugöl'öl'amoromo mu vaejahuaje a jiajëhi  
 éhi jiadeje. Ma-a javuajëhi éhi jiadeje. A  
 nu ano'o va'ëne jioromo ae aho'obëhe nosi  
 nunire rovadeje. <sup>8</sup> Rueromo hesi iho börömoho  
 uehorovoromo vuonugo'i ma-God-are jöhemu  
 ejahobe juvoromo éhuro guomadeje. Korosire  
 anamu guomadeje. <sup>9</sup> Ëhi é'ë'ego éhuni God-  
 ro ajamamu huro dö maro aji namijamu  
 hesi ihohuro iho ioro'iroho iosiramuiromo  
 börömo bëhe jië'je <sup>10</sup> éhu'ego ae aho'obëhe  
 ö'idöre raromarue sa'are raromarue sa'a  
 uhure raromarue aribövioho noro Iesuare  
 ihoho böröme höromo hu rajahromo ague aho  
 raromoromo <sup>11</sup> ae aho'obëhe noro huruohoromo  
 uvoruomoröhego: Iesu Keriso iae Bada hö  
 uvoröhego. Ëhi uvo'iramu God Vavu hesi ihoho  
 börömo bëhe jio'ë'e.

*Ramoramо'ere raromarue ariböviohu'o ave  
 sa'are raromoromo noro ironöle ajivëvo'iröhe  
 jöhoje.*

<sup>12</sup> Nasi ö mueno'e naehu jemë'o gemu mae  
 hijamu jemëhu nasi jö ejehonövariijoho röhu  
 jarovo na öri égobövire hijajohu'o nasi jöho  
 ejehonövore. Ëho börömohoje. Juhuoni'o bu-  
 tubutu'o muoho avo'avocho vaerego jemë mae  
 jëvo'iro. <sup>13</sup> Ëhesi bëhoho God-ro jemesi dë  
 vövöbajo'oho huotovëhajeje éhuro huhu nimaje  
 éhi jië'e muoho vae'i nimoromo vae'irarijego.  
 Ëhuni éhi jië'e muoho vaere.

**14** Mu rabe rabe vaejë'oho nadi muoho bijönimoromo jö sisëho atoromo o jöho aho'ahëmìl'irögoro a'i muoho ma-vaere.

**15-16** Ëhi ë'ë'oho jemë jö sisëho bogojëvo'i uhohu'o ma-mae jëvo'ë'e. Sareri sareri'e aribövi sisëhu'o gemuore raromo'aruje röhu jemë God-are abozi harihu'e maemu jëvo'ë'e. A i'ovavuo'iröhe jöho röjëhiromo ëhuro jiji mujöru'ehu ramoramore ajivo'amajëhi ramoramore raromarue aribövioho ëhi ajivëvore. Jemë ëhi ë'ë'oho Keriso-are majaho rue'iramu naro uvo'ejo: O mabëhéjo. Jemë nasi jöho mabëhe ejeharije höjo. Na sa'are hiromo jöho majëhiromo muoho bogo ëma sivohoromo darugoho boremi'özjode höromo jemesi jöëni nimoronimorohë'i jöho jövo'ejo.

**17** Röhu hesi nani'o nani aëro anego'iramu guomevo'ë'e. Ëhi'l'o'iramu nasi köho rue'iramu God-ro uvo'ë'e: Ëho na suvuore bojemijajëjo. Röhu jemëhu hesi örire mae uehorovoromo mu vaejarujoho ëhu'o God bojamijaruje suvuoreje. Röhu nasi suvuorohu'o jemesi suvuorohu'o gemuoro jio'iramu God-ro garomo uvo'ë'e: Iae eni jiajëjo. Ëhuni aehu na ëhi anegego guomevo'iröhoho na huë mae jeve. Huë mae jevoromo jemë'o gemu mae nimoroheve.

**18** Naehu ë'ajëhi jemëro huë mae jioromo na'o gemu mae nimorohore.

*Paul-hu Timothy'o Epaphroditus'o rëmö'özjego  
Philippi amore ö'iröhe jöhoje.*

**19** Iae na uehorovoromo uve: Bada Iesuhu nimë'ohuro ëhuro na ma-burëro Timothy

nugö'ö'iramu jemesi örire ö'a'ajëjo. Ëhi ë'irodëro nege. Ëhesi bëhoho ö'oromo jemëhu diehi raromaruje jöho huro vuonorö'ö barovego na heromo huë mae jevoröhego. <sup>20</sup> Timothy-ro gemuëro na'o gemuoro uehorovoromo bogo döhemuoho a'i uhohu'o jemesi jöho uehorovajeje. Ëhi jië'e a göho bogojeve. <sup>21</sup> A ioro'iorohuro bogo Iesu Keriso-are jöho uehorovo'i jabesi muohemu uehorovarueje. <sup>22</sup> Röhu jemë gavarujoho iae hu a maeje. Harihehu vavu ajëmijaruëhi huro na ëhi ajemiromo Keriso-are jö ma hesi muoho vaebe rovë'ije. <sup>23</sup> Ëhuni na uehorovoromo uve: Ga'irode nasi muoho diehi jiamu gavë'iroho hu nugö'ö'ejöjo ö'iröhego. Na ëhi nege. <sup>24</sup> Röhu naro uve: Badahu nimë'oho majae ma-bisemu barë'iramu na'o ö'ejöjo.

<sup>25</sup> Röhu naro uvodeje: Nosi Christian öho Epaphroditus nugö'ö'ejöjo ö'ojöro. Ëhuremu iae mae höjö. Röhu avevejö'oho hu na'o bimuvoromo Satan'o muorovoromo mu vaejaje aeje. Mami'e jemëro nugö'öjarijeje huro rueromo jemesi ihore nasi vavaenoho ajem-inövo'iröhego. Röhu naro hu sionëro nugö'öje. <sup>26</sup> Naehu hu nugö'ö'irode hesi bëhoho huro ae aho'obëhe jemëni vavaenime. Vavaenimoromo nurunurume jemesi jöhuni. Ëhesi bëhoho jemë hejarijeje uvavamu: Hu guomo guome baejade hö uvamu hejarijohuni ëhuni. <sup>27</sup> Iae mae. Hu guomo guomo böröme baeromo guomo hesi ji-adeje. Röhu God-ro hesi jöëni vavaenimoromo ajamijadeje. Bogo hesi jöënioho gemu vavaenimo'i a'i nani vavaenimadeje hu guomego naro

huë vavaene gö'o döre baejöëni. <sup>28</sup> Ëhuni na nego avohe nugöl'ojego ö'ojöro ëhuro hu ö'ego jemëro röhu maho garomo nimoroho'irarijego o ëhuro nasi nurunuruoho barëjanovoröhego. <sup>29-30</sup> Ëhu'e jiaje hu ö'ego Badare ihoro börömo mae nimorohoromo rajahire. Ëhesi bëhoho hu uvadeje: Philippi amo rajoho ame ëgoböviro raromoromo Paul ajamijë'oho bogo eni jiajëjo. Ëhuni naro jabu'o röromo è muoho vae'ejö uvoromo ëhuni hu ave sa'are hi'iröhe jöho bogo uehorovoromo guomo hesi jiadeje. Ëhuni ö'ego rajahire. O huhu è'adëhi ae rahu jabiesi sino bogo uehorovo'i Keriso-are muohuremu uehorovë'oho èhi jië'e aribövioho aho'obëhe rajëhinövore.

### 3

*Noehu God-are nunire mae riravo'iröhe öroho  
ëho Keriso mae uehorovo'iröhe jöhoje.*

<sup>1</sup> Nasi ö mueno'e ijo tugoho'i jöho majëhi'ië'e. Badare öroro uehorovoromo nimorohore. Röhu ave majëhi'irode jöho mami'e uëvodoho röhu maho majëhijë'oho bogo u'uvevo'ë'e. O jemë röhu maho hejë'oho ëhuro avo'avoho raromo'aruje. <sup>2</sup> Ö sisëho va'ëne aribövioho gëvë'i raromore. Jaburo God-are muoho sisë'i röjëhijarueje. Ëhuni gëvë'i raromore. Jaburo uëvarueje: Jemëro Jew rajo muoho vaeromo jemesi sinoho tarivorëjo ëhuro God-are nunire mae riravo'irarije. Röhu jabuhu röjëhijarue muoho bogo mu maehu jio'i èho sino taritarivo'iröhe muoho jianove. Ëhuni gavë'i

raromore. Ëhi jië'e ariböviohuro sarerëmi'ë'ö. <sup>3</sup> Jaburo sarerivoromo uvoruomajeje: No sine tarivo'amë'ëro ëhu'ëro no God-are aribövie javuajëjo. Röhu jabumë ma-döhemu God-are aribövie jioruomo'i a'i no uhohu'o God-are aribövie javue. Ëhesi bëhoho noro God-are Aru'aho hesi darugoho baeromo hu rajahiromo Iesu Keriso uehorovoromo nimorohë'i atarueje. No bogo uvarueje: Nosi muohu'o iohohu'o ave sa'are mae jiahue'oho ëhuro God-are nunire mae riravo'ejarëjo. <sup>4</sup> Röhu nosi muohu'o nosi iohohu'o mae jiahue'ego ëhuro God-are nunire mae javuo'ibejo Paul nasi muohu'o iohohu'o mae jiehë'ëro jië'ëro uvo'ibejo: Na hesi nunire mae jevajëjo. A ioro'iorehu uvaruoho: No Jew rajo maëro javuë'ëro Jew rajo muoho avo'avoho vae'ego God-are nunire mae javuajë uvaruoho Paul naro ëhi uvo'ibejo iae mae jio'ibejo rabëni naro jabumë iosirëmiromo Jew rajo maho na jevë'ego. <sup>5</sup> Rahevamu hurae gemu barëjamu Jew rajo muoho vaejevoromo nasi sinoho tariojehareje. Nasi vëmu vavu'oho Israel rajëro jëvë'ëro ëhu'ëro na'o Israel raje jeve. Benjamin-are uje gemuoho jeve. Nasi hijo mino'ehu Hebrew huëhu atobe Hebrew mu vaebe rovarëhi na'o ëhi gemuoho ömajeje. O mu vaeröhe jögoru ejaje ae jevadeje. Pharisee ariböviehu jögoru e avohojöro uövuaruëhi na ëhi'obe rovodeje. <sup>6</sup> O God-are mu nimode ae jevadeje. Naro uvodeje: Jew rajo muoho God-are mue höromö ekaresia aribövioho sisë vaejëvo'i hijodeje. Jew rajo nosi jögoru ejaruohuro ëhuro

mae javuo'ibejo ja uvo'ibejane: Nörö mabëhi mae höjo. <sup>7</sup> Ëhi jië'e mu mae iho mae jevamu iae marëjevajë uvodoho jaruwoho Keriso-are jöho uehorovoromo uvajeje: Ëhuro sisërëjevë'e höjo. <sup>8</sup> Naro uvajeje: God-are nunire mae nami'irögoro naehu Jew rajo mu vaejë'ohuro mu ioro'iorohu'o noehu vaejego God-are nunire mae javuoröhe ëhi jië'e mue aho'obëhe naehu uehorovë'oho ëhuro sisërëjevo'ajëjo. Iesu Keriso nasi Börömo ga'irodoho ëhemu börömoho höjo. Hesi jöëni mu ioro'ioroho musisi va'ëne höromo boremi'öjë'e jeve ëhuro naro Keriso bae'irodëro. <sup>9</sup> Keriso baeromo hu'o gemuoro bimuvo'irodëro. Jaruwoho bogo nasi éma biririvoromo Moses-are jögoroho eromo uvajeje: God-are nunire mae jevajëjo. Bogo. A'i na Keriso mae uehorovoromo ëhuro hesi nunire mae jeve. Ëhesi bëhoho God-ro ajamuego no mae uehorovoromo hesi nunire mae riravarueje. <sup>10</sup> Na nege nasi simanohuro dë vövöbajo'ohuro Keriso ga'iro hu ri'öjë'ëro hesi darugohuro ajemijego marëjevojöro. Huhu huë vavaeni vi'ehi baejadëhi na'o ëhi gemuoho baebe va'iro. Huhu mu sisë mu'uvahuo'i guomadëhi na'o ëhi mu sisë garomo hörëro taemobe va'irodëni. <sup>11</sup> Sisëho hörëro taemobe va'oromo ëhuro ijönö Iesuhu guomoromo ri'öjadëhi nani na'o eni jevë'ohuro nasi sino haho'ohu'o guomoromo ëhi ri'ö'irodëro. Ëhuremu nege.

*Paul-hu daruge aho'o bojamiromo Keriso-are mu vaejadëhi no'o ëhi ë'iröhe jöhoje.*

<sup>12</sup> Na bogo uehorovoromo uvajeje: Mami'e Keriso-are muoho baejë'ëro mu sisë bogojevo'i

bövie bise'e eni jevajëjo. Bogo ëhioho uvo'i a'i Iesu Kerisoro hesi baejevë'ego ëhuni hesi muoho bae'i biririvoromo muoho vaejajeje. <sup>13</sup> Nasi ö mueno'e na bogo uvajeje: Naro Keriso-are muoho bae barëjë'e jevajëjo. Röhu ave muoho gemu uehorovajeje. Mue urimo vaebe rovodoho na bogo uehorovo'i ijönö jioröhe muohuremu bae'i sivohoromo ë'o gavajeje. <sup>14</sup> Naehu vaejöro Kerisohu nimajoho ëhemu nunire bamoromo ë ahorirëro vae'i biririvoromo ë'o gavajeje ëhuro ruahö'örömo suvuoroho bae'irodëro. Ësvuoro hesi bëhoho God-hu uevego na Iesu Keriso'o gemuoro jevë'ëro hesirire ajiomo'irodohoje.

<sup>15</sup> Ae rahu a duvahonö'e uehorovarue aribövi javuë'oho naehu uëvodëhi ëhi uehorovonövo'ejo. O jemëhu jö gö uehorovë'iroho God-ro ëho röjëhi'iramu ga'a'aruje jemë bogo eni jëvo'iramu. <sup>16</sup> Ëhi jië'ego Keriso-are jö ejahobe rovaroho ëhi ejahobe va'ejo. Ëhi jië'oho iae maeje.

<sup>17</sup> Nasi ö mueno'e jemë gemuoro bimuvoromo naehu ë'ajëhi ëhi ë'onövore. Noehu öri mare jijiharuëhi ëhi jijiharue aribövioho gë avohoromo jemë'o ëhi ë'ore. <sup>18</sup> Röhu ave jöho majae aho'o majëhi'i hijodoho huë vavaene bogo bise'o vadu'oho baeromo röhu maho majëhi'irögoro ë'e. Ae aho'obëhe mu sisë vaebe jijihoromo ëhuro Kerisohu korosire guomade jöho ahanovoruomajeje. <sup>19</sup> Ahanovoromo röhu noehu God börömoho hö uehorovaruëhi ëhi jabumëro jabiesi sinohuremu nimajoho börömoho hö uehorovoruomajeje. Javoji'e muoho vaeromo mae höromo nimoronimorohë'i jijihoruomajeje.

Ave sa'a hesi muohemu uehorovoruomajeje. Ëhu'ëro jië'ëro vëni'e örire va'o hesi jioruome. <sup>20</sup> Jabumë ëhi jië'e aribövie jioruome röhu nosi öri ari'oho bogo aveho jio'i ö'idöre jie. Ö'idöre jië'ego no raromoromo muebejarueje Bada Iesu Keriso no maro bamavuaje ahuro ö'idöre jioromo rueröhego. <sup>21</sup> Rueromo mue bövie bise'e ruahö'öl'amoröhe darugoho baeromo nosi sino haho'e u'uhavuajoho avohahuo'iramu gorosovoromo hesi sino haho'o mabëhe jiajëhi ëhi mabëhe javuo'amo'ë'e.

## 4

*Noehu uehore gemu baeromo nimorohoromo  
mu maemu uehorovo'iröhe jöhoje.*

<sup>1</sup> Ëhuni nasi ö mueno'e Badare öroro ëhi uehorovoromo biririvoromo riravore. Na jemesi örire dë vövöbajo'e aho'o uehorovëvego jemesi jöëni vavaenegajeje. Na jemesi jöho uehorovoromo huë mabëhe jevë'ëro nimoroho avohajeje. Ëhuni na jemesi örire uëve: Nasi ö mueno'e biririvoromo riravorëjo.

<sup>2</sup> Naro Euodia jasi örire uave. Syntyche jasi örire uave. Badare magonahe gemuoho jëvaje ëhuni uehore gemu baere. <sup>3</sup> Röhu ja na'o mue gemuoho mae vaejanue ae javë'ego naro ave jöho jasi örire uave. Ëmagonaño niö'ioho ajëmijego gemuoro avoho ari'iro. Ëhesi bëhoho ë magonaoho jaburo na'o gemu mae bimuvoromo God-are jö ma hesi muoho biririvoromo vaejareje. Jaburo Clement'o na'o mu vaejarue aribövi ioro'iorohu'o ëhi ë'areje. Jabeli ihoho

mae raromemu raromo'iröhe ö'idöre jiaje surire  
ë jajivo'amë'eje. Ëhuni ë magonaho niö'ioho  
ajëmine.

<sup>4</sup> Röhu jemë ae aho'o Badare ae gemuoho jëvaje  
majaе ëhi nimorohonövore. Röhu maho uëve:  
Nimorohorëjo.

<sup>5</sup> Ma-sanuovoromo ae aho'obëhe jabesi öroro  
huë mae baejëvore. Badahu rueröhe majaho  
dunove. <sup>6</sup> Bövi bise'o rovë'iroho nadi nu-  
runurumo'irögoro a'i God-hu ajëmijajoho huë  
mae uavë'i ëninamiromo jemesi huë vavaenoho  
hesi öroro majahinövore. <sup>7</sup> Jemëhu ëhi ë'ë'oho  
God-are sanu'e mahuro noehu uehorovarue  
sanu iosiramijajohuro ëhuro jemesi uehoroho dë  
vövöbajo'oho duohëho'iramu sanuovëho'ë'e Iesu  
Keriso'o gemuoro jëvë'lëro.

<sup>8</sup> Nasi ö mueno'e ijo tugoho'i jöho uë'ië'e.  
Aviëhi jië'e muohemu uehorovore. Jö mae  
ataruhuremu a duvahonö'e vaejarue muemu  
ahorirëro vaejarue muemu ajiro raromarue  
muemu dë vuëvo'e muemu aji ma'e muemu  
huë baejë'e muemu mu rabe rabe ma-maemu  
jiajoho rabe rabe noehu mae uehorovaroho ë  
muohuremu uehorovonövore. <sup>9</sup> Naehu rabe rabe  
rötjhijamu o vaejamu jemëhu garomo heromo  
baejarijoho ëhi jië'e muohuremu vaenövore. Ëhi  
ë'ë'oho God jö sanu'e bojamuijaje ahuro jemë'o  
hi'ë'e.

*Philippi ekaresiaeahu huë baeromo Paul-are  
örire suvuoro bamahamu Paul-hu mabëhe uëvade  
jöhoje.*

<sup>10</sup> Bada'o gemuoro jevë'ego na nimorohevo  
avohe ë hesi bëhoho jemë majae bisemu ëgo'o

bogo ajemijarijoho avevejö'e röhu maho uehorovevoromo huë baejevarijohuni. Iae jemë na uehorovevobe rovarijeje röhu huë baejevo'irarije öroho bogo birohariate. <sup>11</sup> Na bogo uve: Jemë nasi huë vavaenoho bogo gevanovarije höromo bogo ëhunioho jajive. A'i huë mae o huë sisë rovë'oho na uvajeje: Na rabe rabe jevajoho iae eni höjo. Ëhi jië'e uehoroho iae na avoho baejë'e jeve. <sup>12</sup> Bövi bise'o bogo eni jevajoho o marohë'e mae jevajoho iae na gavë'e jeve. Eni da'uegë'oho o hömevë'oho bövi bise'o marohë'e mae jevë'oho o inömo rumo'e jevë'oho o diehi jevë'oho naro uehorovoromo uvajeje: Na iae eni jevajëjo. Ëhi jië'e uehoro hesi bëhoho birohë'e jeve. <sup>13</sup> Keriso biriri bojemaje ahuro ajemijë'éro ëhuro mae o sisë rovë'oho na biririvoromo nami'irodoho eni jeve.

<sup>14</sup> Röhu nasi huë vavaeni ajemijarijoho ého iae mae ë'arijeje. <sup>15</sup> Röhu Philippi amo rajohumë jemë'o iae gavarijeje. Na urimë'i aevoromo Keriso-are jö ma majëhibe juvodevare evare naro jemesi sa'aho Macedonia vuonugo'i va'amu ekaresia ioro'ioro bogo ajemi'i jemëremu ijo bajo suvuoroho bojemiromo huë maho mana baejarijeje. <sup>16</sup> Röhu jemesi sa'aho bogo vuonugo'i a'l'i Thessalonica amore va'o hijamu evare na bogo eni jevo'ego jemëro suvuore nasi örire nugö'ö'i arinövariyeje. <sup>17</sup> Na bogo suvuoroho nahoromo ëhunioho uë'i a'l'i na nege jemëro suvuore bojemego ëhuro ijönö God-hu suvuoro mana jemesi örire bojëmi'iröhoho bövi mae jiëhoröhego. <sup>18</sup> Epaphroditus-ro jemesi suvuoroho nasi örire

barovadeje. Ëhuni uëve: Jemesi suvuoroho iae na baejë'e jevajëjo. Iae eni höjo. Marohë'e mae höjo. Jew rajehu mi God-are örire suvuoro bojami'i anoromo vënire buejaho'ego God-hu ridi heromo vuëvonövadëhi jemesi suvuoroho ëhi jie. God-ro garomo suvuoroho nimoromo huë mae jiajeje.

<sup>19</sup> Röhu jemë rabe rabe bogo eni jëvamu gëvë'oho jemë Iesu Keriso-are ae gemuoho jëvë'ego nasi Vavuohuro iae ajëmi'ë'e hu daruge aje bövie bise'e bogo bise'o vadu'oho jië'ero. <sup>20</sup> Röhu na nege God nosi Vavu hesi ihoho ioro'iore gemu dö maro jiope va'oröhego. Iae mae.

*Paul-mëhu ijo tugoho'li jejëmijare jöhoje.*

<sup>21</sup> Röhu God-are aribövie Iesu Keriso-are aganoho aho'obëhe jejëmijajë uëre. Christian ö mueno'e na'o gemu mae arijaruohuro jemesi örire jejëmijö. <sup>22</sup> God-are aribövie aho'obëhe jemë jejëmijö. Röhu Rome a börömo hesi osare raromarue God-are aganoho jaburo bövi maho jejëmijö.

<sup>23</sup> Bada Iesu Kerisoro jemesi aru'ahohu'o jioromo huë baeromo ajëminövo'ë'e. Ahia mino'e.

**God-are Jögoru I'oho  
The New Testament in the Omie language of Papua  
New Guinea  
Nupela Testamen long tokples Omie long Niugini**

copyright © 1991 Wycliffe Bible Translators, Inc.

Language: Ömie (Omie)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-23

---

PDF generated using Haiola and XeLaTeX on 11 Nov 2022 from source files dated 9 Oct 2020

a68769b4-6180-5825-a17e-676d8f6a7efa